

PRIMERA EPÍSTOLA DEL APÓSTOL SAN PABLO A TIMOTEO

Salutación

1 Huēj huin Pablo tsínj huin apóstol. Nī gan'anj ga'mī si-nuguan' Jesucristo rian ni ngüi. Daj si hué daj ga'nin' Yan'anj sun riānj. Nī Yan'anj huin si nacaj né'. Nī hué daj ga'nin' Señor Jesucristo sun riānj nej. Nī xi'í Jesucristo ni'i né' sisi gu'i'yaj sa' Yan'anj nga né'.

²Nī 'yā 'ngo yanj carta huaj rián re' huín re' Timoteo. Nī daj rún' huin da'nī huin yyá re' xi'í si xuman ruhuá re' ni'yáj re' Yan'anj: Nī Yan'anj huin chrej né'. Nī Jesucristo huin Señor nicaj sun rian né'.

Nī huin ruhuāj sisi gu'i'yaj Yan'anj huin chrej né' sinduj rián re'. Nī nahuin 'i ruhua Yan'anj ni'yaj re' nej. Nī gahuin din'inj ruhuá re' nej. Nī hué daj gu'i'yaj Jesucristo nga re', ruhuāj aj.

Advertencia contra falsas doctrinas

³Nī achínj jni'yā rián re' sisi gūna re' xuman' Efeso daj rún' gataj snan'an gunún re' ngaa gan'an estado Macedonia. Ngaa nī ga'ue ga'nin' re' sun rian ni tsínj man xuman' daj sisi sī digyán ni sij ango

nuguan' rian ni ngüi mánj. ⁴Nī ataj snan'an gunun re' sisi sī xacaj ni sij cuenta xi'í cuento snan'anj nga lista nico táj si-xugüi ni xi ni sij guimán asij ná. Maan si unun' ni dugüi' né', 'yaj ni nuguan' daj. Nitaj si chracuij ni nuguan' daj si guxuman ruhua né' ni'yaj né' si-nuguan' Yan'anj mánj. Hué daj gataj re' gunun ni sij. ⁵Nī nuguan' a'nin' né' nan 'yaj sisi ga 'i ruhua né' ni'yaj né' go'ngo ni dugüi' né'. Nī hué daj 'yaj ni ngüi dagahuin nuguan' sa' a'mi né'. Nī hua sa' niman ni sij. Nī ani sa' ruhua ni sij nej. Nī xuman sa' ruhua ni sij ni'yaj ni sij Yan'anj nej. ⁶Nī hua duna go'ngo ni ngüi chrej sa' nan. Nī maan si unun' ni sij xi'í nuguan' nitaj si ní'yanj mánj. ⁷Nī huin ruhua ni sij gahuin ni sij maestro digyán si-ley Moisés rian ni ngüi. Nī 'yaj ni sij sisi ni'i sa' ni sij nuguan' a'mi ni sij. Sanī na'ue gara da'nga' ruhua ni sij nga nuguan' a'mi ni sij mánj.

⁸Nī ni'i né' sisi sa' si-ley Moisés sisi garasun né' ley daj daj rún' huin ruhua Yan'anj gu'i'yaj né'. ⁹Nī ni'i né' sisi sé rian ni tsínj hua nīca niman a'ui' Yan'anj ley daj. Sanī a'ui' Yan'anj ley daj rian ni tsínj

unun' nga Yan'anj nga ni tsínj nun dagahuin nej, nī tsínj 'yaj quij nej, ni tsínj 'yaj gaquin' nga ni tsínj nitaj si hua ní'yanj rian Yan'anj nej, ni tsínj dagahui' chrej ni sij nga nni ni sij, ni tsínj dagahui' ango níman nej, ¹⁰ni tsínj a'mi nga squira' nej, ni tsínj a'mi nga dugüi' ni sij huin jnánj ni sij, ni tsínj 'yaj tū ni ngüi nga ni tsínj a'mi snan'anj nej, ni tsínj ataj rian Yan'anj sisi hua yya si-nuguan' man'an ni sij, sanī sé si xanga' si-nuguan' ni sij nej, ni tsínj na'uej ruhua dagahuin nuguan' xanga' nej. ¹¹Nī hué daj a'mi si-nuguan' Yan'anj xi'í si-lej Moisés. Nī nuguan' sa' nīn' huin si-nuguan' Yan'anj. Nī hua 'ueé nīn' rian Yan'anj. Nī garasun Yan'anj riānj sisi ga'mī nuguan' sa' daj rian ni ngüi.

El ministerio de Pablo

¹²Nī a'uuj si guruhua Jesucristo huin sij Señor nicaj sun riún'. Daj si riqui sij fuerza riānj. Nī gani ruhua sij sisi huinj 'ngo tsínj ga'ue gui'yaj sun sa' si-sun Yan'anj, ruhua sij. Nī riqui sij sisi ga'mī si-nuguan' sij rian ni ngüi. ¹³Nī asij sini nī ga'mi quí xi'í Jesús. Nī chran' yun'ün sij nej. Nī ga'mi huēj rian sij. Sanī nani yaco ruhua sij ni'yaj sij man'ānj. Daj si achin si guxuman ruhuāj nī'yā sij. Nī nun guini'inj un sin gui'yā mánj.

¹⁴Nī gui'yaj Señor 'ngo sinduj nico ngāj. Nī guxuman ruhuāj ni'yā sij. Nī gahuin 'i ruhuāj ni'yā ni dugüi'ij, gui'yaj sij nej. ¹⁵Nī nuguan' nan huin 'ngo nuguan' xanga'. Nī hua nīan si guxuman ruhua daran' né' nuguan' nan: Nuguan' nan ataj sisi ga'na' Cristo Jesús naçaj sij ni ngüi da'ui gaquin'. Nī huēj huin tsínj

da'ui doj gaquin' daj nga ango ni ngüi. ¹⁶Xi'í daj nī nani yaco ruhua Jesucristo ni'yaj sij man'ānj. Nī hué daj gui'yaj Jesús sisi xacaj ango ni ngüi cuenta sisi ga'ue guinico' ni sij Jesús huin ni sij ni tsínj guxuman ruhua ni'yaj Jesús. Nī gane nīganj ni sij nga Yan'anj anj. ¹⁷Hué dan nī nīganj guinun yan'anj né' Yan'anj. Nī hué daj ga'mi sa' 'ueé né' rian Yan'anj huin rey nne nīganj. Nī nun rugüi' Yan'anj guini'i ni ngüi mánj. Nī urin Yan'anj huin Yan'anj xanga'. Nī ni'i Yan'anj daran'anj.

¹⁸Nī rún' huin da'nī huín re'. Nī a'nīj sun rián re' Timoteo sisi daj rún' 'yaj gana 'ngo snado rian sayun, nī hué daj gui'yaj ganá re' rian sichre, ruhuāj aj. Daj si hué daj ga'mi ni sij si-nuguan' Yan'anj xi'í re' aj. ¹⁹Hué dan nī huin ruhuāj sisi guxuman sa' ruhuá re' ni'yaj re' Yan'anj. Nī 'ngo ga sa' ruhua nimán re' nej. Daj si guere' ruhua go'ngo ni sij. Nī nun xuman ruhua ni sij mánj. ²⁰Nī hué daj gahuin nga nūngüej tsínj gu'naj Himeneo nga Alejandro. Nī naga'uuj nūngüej sij rian sichre Satanás sisi gahuin chrūn nūngüej sij si ga'mi quij nūngüej sij rian Yan'anj ga mánj.

Instrucciones sobre la oración

2 Hué dan nī asij sini, nī huin ruhuāj sisi gachinj jni'yaj á re' rian Yan'anj. Nī gachinj jni'yaj á re' xi'í daran' ni ngüi. Nī ga'ui' a ni é re' si guruhua Yan'anj xi'í daran' ni ngüi. ²Nī gachinj jni'yaj á re' xi'í ni tsínj nicaj sun nga daran' ni tsínj huin rian nej. Ngaa nī ga'ue guiman din'inj né' chruhua xungüi nan. Nī 'ueé gui'yaj né' guinico' né' Yan'anj.

³Ni sa' huin sisi hué daj gui'yaj né'. Daj si aran' ruhua Yan'anj sisi hué daj guiman né'. Ni Yan'anj huin si nacaj né'. ⁴Daj si huin ruhua Yan'anj sisi ganani daran' ni ngüi. Ni guini'i ni sij nuguan' xanga'.

⁵Daj si hua urin Yan'anj. Ni hua urin tsínj niquin' a'mi rian Yan'anj xi'í ni ngüi huin sij Jesucristo. ⁶Ni naga'ui' Jesús man'an sij ngaa gahui' sij rian rugutsi sisi naru'ue sij man'an sij xi'í si-gaquin' daran' ni ngüi. Ni gani Yan'anj 'ngo güi gahui' Jesús. Ni hué gue güi daj gahui' yya sij guini'i ni ngüi. ⁷Xi'í daj ni gari sun Yan'anj sisi gahuinj apóstol sisi gan'anj ga'mi nuguan' sa' rian ni ngüi. Ni digyanj rian ni ngüi 'na' anéj chrej sisi guxuman ruhua ni sij ni'yaj ni sij si-nuguan' Yan'anj huin nuguan' xanga'. (Ni nuguan' a'mi nan huin nuguan' xanga'. Ni nitaj si a'mi nnéj mánj.)

⁸Ni huin ruhuāj sisi daran' yu'uj, ni gachinj jni'yaj ni tsínj rian Yan'anj. Ni nachi nicaj ra'a ni sij ne' xata' gachinj jni'yaj ni sij rian Yan'anj. Ni gui'yaj sa' ni sij, ruhuāj aj. Ni si ga'man ruhua ni sij. Ni si ga'mi ni sij güenda gunun' ni sij mánj.

⁹Ni huin ruhuāj sisi ga cuidado ni yun'unj xana, ni gunun sa' ne si-gan' ne. Ngaa ni gataj ni ngüi sisi sa' huin ne. Ni si gui'yaj ne daj rún' 'yaj ango ni yun'unj xana ngaa huin ruhua ne sisi ga'mi ni tsínj nga ne. Ni si ga chra ne daj rún' hua chra ni ngüi xana ngaa da' ganicaj cúj chra ne. Ni si garasun ne oro nga perla mánj. Ni si gunun ne atsij du'ue nin' ruhua nej. ¹⁰Sanj gui'yaj sa' ne, ni chracuij ne ni dugüi' ne. Ngaa ni

guini'i ni ngüi sisi hua yya nico' ne Yan'anj anj. ¹¹Ni dínj gane du'ua ne, ni gahuin chrun ne. Ni dagahuin ne daran' nuguan' unun ne. ¹²Na'uej ruhuāj sisi digyan ni yun'unj xana ngaa nahuin yu' ni sij. Ni si ga'nin' ni yun'unj xana rian tsínj mánj. Maan si dínj gane du'ua ne, ruhuāj aj.

¹³Daj si hua sini tsínj gu'naj Adán, gui'yaj Yan'anj. Asij ni gui'yaj Yan'anj yun'unj gu'naj Eva nej.

¹⁴Nun digya' yun'unj sichre Adán. Sanj digya' yun'unj sichre yun'unj xana daj. Ni ngaa digya' yun'unj sichre unj, ni gui'yaj unj gaquin'.

¹⁵Sanj ganacaj Yan'anj ni yun'unj xana xi'í si a'nga da'níj ne. Ni hué daj gui'yaj Yan'anj sisi guxuman ruhua ne ni'yaj ne Yan'anj. Ni gui'yaj sa' ne nej. Ni si gahuin yan'anj ruhua ne nga ni dugüi' ne mánj.

Requisitos para ser obispos

3 Nan huin 'ngo nuguan' xanga'. Sisi hua 'ngo tsínj huin ruhua guinicaj yun'unj scanij ni ngüi nico' Yan'anj, ni sun daj huin sun sa' huin ruhua sij gui'yaj sij. ²Ni tsínj nicaj sun daj, ni hua nian si ga'mi sa' ni ngüi xi'í sij. Ni gane sa' sij nga urin yun'unj xana. Ni si guixini sij mánj. Ni hua cuidado sij nga si-chrej sij. Ni hua ní'yanj ni ngüi rian sij. Ni niganj hua ruhua sij sisi gatu ni ngüi 'na' ducua' sij. Ni chrun sij digyan sij rian ni ngüi. ³Ni nun aran' ruhua sij nga rente. Nitaj si nano' sij gunun' sij nga ni dugüi' sij mánj. Sanj huaj a'mi sa' sij. Ni 'yaj sij sisi gahuin din'inj ruhua ni ngüi. Ni nitaj si huin ruhua sij gui'yaj

gana sij nico san'anj mánj. ⁴Ni hua nian si digyán sij 'ngo chrej sa' rian ni dugüi' sij man ducúa sij. Ni hua nian si dagahuin sa' ni da'níj sij si ataj sij nej. Ni si ga'mi snan'anj ni da'níj sij rian sij mánj. ⁵(Daj si sisi na'ue ga'ui' sij 'ngo chrej sa' rian ni dugüi' sij man ducúa sij, ni asa' ga'ue dugumi sij daran' ni ngüi nico' Yan'anj únj.) ⁶Hué dan ni nun hua sa'aj sisi guinicaj yun'unj 'ngo tsínj guxuman naca ruhua ni'yaj Yan'anj mánj. Daj si ga'ue gahuin nne sij nga si-sun sij. Ngaa ni gahuin castigo sij daj rún' gahuin nga sichre, gui'yaj Yan'anj. ⁷Ni hua nian si ga'mi sa' ni ngüi nun nico' Jesucristo xi'f sij nej. Ngaa ni si ga'mi quij ni ngüi daj xi'f sij. Ni a 'ngo rian ni gaquin' si guinij sij, gui'yaj sichre mánj.

Requisitos para ser diáconos

⁸Ni hué daj nga ni tsínj huin diácono ni tsínj 'yaj sun rian ni ngüi nico' Yan'anj. Ni hua nian si ga sa' niman ni sij. Ni si gahuin ni sij ni tsínj ga'mi huij nuguan'. Ni si guixini ni sij. Ni si digya' yun'unj ni sij ngaa gui'yaj gana ni sij san'anj mánj. ⁹Ni ga nica ruhua ni sij nga nuguan' xanga' huin nuguan' xuman ruhua né'. Ni ga sa' niman ni sij nej. ¹⁰Sani hua sini xacaj cuentá re' sisi nitaj 'ngo si gui'yaj ni sij. Ngaa ni sisi nitaj, ni ga'ue gahuin ni sij tsínj diácono aj. ¹¹Ni hué daj nga ni yun'unj xana nej. Hua nian si ga sa' niman ne. Ni si ga'mi snan'anj ne mánj. Ni si guixini ne mánj. Ni 'ueé gui'yaj ne nga daran'anj. ¹²Ni 'ngo tsínj diácono, ni gane sa' sij nga urin yun'unj xana. Ni hua nian si digyán

sij 'ngo chrej sa' rian ni da'níj sij nga ni ngüi man ducúa sij nej. ¹³Daj si ngaa 'yaj sa' ni tsínj diácono si-sun ni sij, ni ga'mi sa' ni ngüi xi'f ni sij. Ni guisij ni sij ga'mi sa' 'ueé ni sij xi'f si xuman ruhua ni sij ni'yaj ni sij Cristo Jesús.

El misterio de la piedad

¹⁴Ana'ui sisi gan'anj ni'yaj yōj rian nne re'. Sani arünj nuguan' nan a'ni huaj rián re', ¹⁵ngaa ni sisi gahuin ránj guisí rián re', ni ga'ue guini'f re' daj gui'yaj re' scanij ni ngüi nico' Yan'anj. Ni hué ni ngüi daj huin ni ngüi nicaj dugüi' nga Yan'anj hua ni'na'. Ni dugumi ni ngüi nico' Yan'anj nuguan' xanga'. Ni ataj ni sij sisi nuguan' xanga' huin nuguan' daj nej. ¹⁶Xanga' ni huin rian nico nuguan' digyán Yan'anj rian né'. Ni na'ue gara da'nga' sa' ruhua né' daj hua sa' nuguan' daj. Ni gataj nuguan' daj:
Ni gahuin Yan'anj daj rún' hua 'ngo tsínj.
Ni Espíritu Santo gataj sisi hua nica niman sij.
Ni guini'i ni ángel man'an sij.
Ni ga'mi sa' ni tsínj xi'f sij rian ni ngüi man nin' gachra' chruhua xungüi nan.
Ni guxuman ruhua ni sí' guini'yaj ni sí' man'an sij.
Ni nan' sij xata' nahuin 'ueé sij, gui'yaj man'an Yan'anj.
Hué daj hua nuguan' nico' né'.

Predicción de la apostasía

4 Sani ataj renga' Espíritu Santo sisi ngaa guisij gahuin nico yo', ni duna go'ngo ni sij si xuman ruhua ni sij ni'yaj ni sij Yan'anj.

Ni gunun ni sij nuguan' digya' yun'unj nga nuguan' digyan ni nane xi'i rian ni sij. ²Ni gunun ni sij si-nuguan' ni tsinj digya' yun'unj. Ni 'yaj ni si' sisi huin sa' ni si'. Ni nitaj sna'nga' ni tsinj daj nun xi'i si na'uej ruhua ni sij gunun ni sij nuguan' xanga'. ³Ni digyan ni sij rian ni ngüi sisi si ga'ue xacaj dugüi ni ngüi. Ni digyan ni sij sisi si ga'ue xa ni ngüi go'ngo ni rasun sa' ga'ue xa né'. Ni gui'yaj Yan'anj ni rasun daj sisi xa né' huin né' ni tsinj xuman ruhua ni'yaj Yan'anj. Ni ni'i né' nuguan' xanga' nej. Ni hua nian sisi ga'ui' né' si guruhua Yan'anj xi'i ni rasun xa né' daj. ⁴Daj si hua sa' daran' si gui'yaj Yan'anj. Ni si ga'ue gataj né' sisi nun hua sa' si gui'yaj Yan'anj manj. Maan si ga'ui' né' si guruhua Yan'anj xi'i rasun daj xa né'. ⁵Daj si huin sa' ni rasun daj 'yaj si-nuguan' Yan'anj sisi gachinj jni'yaj sini né' rian Yan'anj.

Un buen ministro de Jesucristo

⁶Ni sisi hué daj digyan re' rian ni tsinj xuman ruhua ni'yaj Jesús, ngaa ni gahuin re' 'ngo tsinj gui'yaj sun sa' rian Jesucristo. Ni gahuin re' 'ngo tsinj huin chrun sa' nuguan' xanga'. Ni guxuman ruhua re', gui'yaj nuguan' daj. Ni nuguan' sa' daj huin nuguan' nicó' re'. ⁷Sanj si xacaj re' cuenta nga ni cuento ni'yun a'mi ni ngüi man chruhua xungüi nan. Sanj xacaj cuenta re' si-chrej ni tsinj nico' Yan'anj anj. ⁸Xanga' ni ni'yanj doj nnee cúj né' si guisiqui' gui'yaj né'. Sanj ni'yanj nico niman né' sisi guinico' né' Yan'anj. Daj si sisi hué daj gui'yaj né', ni ga sa' rian né' xungüi nan

nga xungüi ga'na' nej. ⁹Ni nuguan' a'mi nan huin 'ngo nuguan' xanga'. Ni hua nian si dagahuin daran' ni ngüi nuguan' nan nej. ¹⁰Ni hué xi'i daj 'yaj sun né', ni ran' né' sayun 'yaj ni ngüi. Daj si ana'uij né' sisi gui'yaj sa' Yan'anj hua ni'na' nga né'. Ni urin Yan'anj ga'ue nacaj daran' ni ngüi. Ni nacaj xanga' Yan'anj ni ngüi xuman ruhua ni'yaj man'an Yan'anj anj. ¹¹Hué nan huin nuguan' ga'nin' re' rian ni ngüi. Ni digyan re' nuguan' nan rian ni ngüi nej.

¹²Si dunaj re' sisi gataj ni sij sisi nitaj si ni'yanj si-nuguan' re' xi'i si hua lij re' manj. Maan si guinicaj re' 'ngo chrej rian ni tsinj xuman ruhua ni'yaj Yan'anj. Ni gui'yaj re' sisi sa' si-nuguan' re' nga si-chrej re' nej. Ni ga 'i ruhua re' ni'yaj re' Yan'anj nej. Ni ga cuidado re' sisi si gui'yaj re' gaquin' manj. ¹³Ni ngaa nun gahuin guisi rian re', ni gaya re' si-nuguan' Yan'anj rian ni ngüi. Ni ga'mi re' nuguan' sa' rian ni sij nej. ¹⁴Ni dugumi re' sun sa' riqui Yan'anj rian re' ngaa guta' ni tsinj huin achij scanij ni tsinj nico' Yan'anj ra'a ni sij rian re'. Ni ga'ui' Yan'anj sisi hué daj ga'mi ni sij xi'i re'. ¹⁵Ngaa ni gahuin nucuj ruhua re' nga sun sa' riqui Yan'anj rian re'. Ngaa ni guini'i daran' ni ngüi daj 'yaj re' huaj re' ne' chrej rian nga si-chrej Yan'anj. ¹⁶Ga cuidado re' nga man'an re' nga nuguan' digyan re' rian ni ngüi. Ni ga nica ruhua re' nga nuguan' digyan re' daj. Ni sisi hué daj gui'yaj re', ni nacaj re' man'an re' nga ni ngüi unun si-nuguan' re' aj.

Deberes hacia los demás

5 Si ga'mi huee re' rian ni tsinj achij manj. Sanj ga'ui' re' 'ngo

chrej rian ni sij sisī daj rún' huin chréj re' huin ni sij. Nì ga'mi re' nga ni tsínj hua lij sisī huin ni sij rún' huin ni jnánj re'. ²Nì ga'mi re' rian ni yun'unj xana achij sisī huin ne daj rún' huin nní re'. Nì ga'mi re' rian ni yun'unj xana hua lij sisī huin unj daj rún' huin ni xica'uíj re'. Nì ga sa' nimán re' nga ni unj.

³Nì guinun yan'ánj re' ni yun'unj xana mmij. Nì chracuij re' ne sisī xanga' nitaj ango ni ngüi chracuij ne. ⁴Sanī sisī hua 'ngo yun'unj xana mmij daj, nì hua da'níj unj, asi hua da'nī si'nī unj, sanī gahuin chrún sinī ni da'níj yun'unj mmij daj dugumi anin' xica'uíj sij yun'unj mmij daj, daj rún' digyán Yan'anj rian ni sij. Nì hué daj narue anin' xica'uíj sij rian yun'unj mmij daj. Daj si hué daj hua sa'aj rian Yan'anj. Nì aran' ruhua Yan'anj ngaa hué daj gui'yaj ni sij. ⁵Sanī sisī hua yya gunáj urin 'ngo yun'unj xana mmij daj, nì ana'uíj unj sisī gui'yaj sa' Yan'anj nga unj. Nì nugüi nigan' achínj jni'yaj unj rian Yan'anj. ⁶Sanī yun'unj xana mmij achéj si-chrej xungüi nan, nì nunj si hua ni'na' unj, sanī hua gahui' niman unj güenda si-chrej Yan'anj. ⁷Ga'nin' re' sun rian ni ngüi sisī hué daj dagahuin ni sij ni nuguan' nan. Ngaa nì si ga'mi gaquin' ango ni ngüi xi'f ni sij mánj. ⁸Sisī hua 'ngo tsínj nitaj si nahuij ruhua nga ni dugüi' sij nga ni dugüi' sij man ducua' sij, nì hua dunáj sij si xuman ruhua sij ni'yaj sij Yan'anj. Nì quij doj 'yaj tsínj nun nahuij ruhua nga dugüi' sij daj nga tsínj nun xuman ruhua ni'yaj Yan'anj.

⁹Nì rian lista taj si-xugüi ni yun'unj xana mmij, sanī garun

re' urin si-xugüi ni yun'unj xana mmij huaj hua'nij xia táj doj yo'. Nì garun re' si-xugüi unj sisī gane únj nga urin nica unj. ¹⁰Nì hua nian sisī guini'f ni ngüi sisī gui'yaj sa' unj. Nì 'ueé dugumi sa' unj ni da'níj unj ní'. Nì gui'yaj sa' unj nga ni ngüi guisíj ducua' unj ní'. Nì na'nin' unj dacój ni ngüi xuman ruhua ni'yaj Yan'anj ní'. Nì chracuij unj ni ngüi ran' sayun ní'. Nì gui'yaj unj ango ni rasun sa' ní'. Nì sisī hué daj gui'yaj unj, nì garun re' si-xugüi unj rian lista daj.

¹¹Sanī si garun re' rian lista si-xugüi ni yun'unj xana mmij hua lij. Daj si 'na' güi, nì gahuin ruhua unj guinico' unj ni tsínj. Ngaa nì gahuin nini unj rian Cristo. Nì gahuin ruhua unj xacaj ruhua' yún unj 'ngo tsínj. ¹²Hué dan nì da'ui unj gaquin' xi'f si nun dagahuin unj nuguan' gui'yaj yya unj nga Cristo asij sinī. ¹³Nì ango nuguan' huin sisī achéj ne da go'ngo hue'. Nì nanicaj ne huin ne ngüi rumi. Nì sé urin ni ngüi rumi huin ne, sanī hué daj huin ne ngüi a'mi snan'anj nej. Nì nanicaj ne nuná ne xi'f ni dugüi' ne. Nì nun hua sa' sisī ga'mi ne nuguan' da mánj. ¹⁴Nì xi'f daj huin ruhuáj sisī xacaj yun'unj xana mmij hua lij daj nica unj. Nì ga da'níj unj. Nì dugumi sa' unj ducua' unj. Ngaa nì si ga'mi quij ni tsínj unun' nga né' xi'f né' mánj. ¹⁵Daj si hua gahuin nini go'ngo ni yun'unj xana mmij daj rian Cristo. Nì nico' ne sichre. ¹⁶Nì sisī hua 'ngo tsínj, asī 'ngo yun'unj xana xuman ruhua ni'yaj Yan'anj, nì nne 'ngo yun'unj xana mmij ducua' sij, sanī hua nian sisī chracuij sij yun'unj xana mmij daj. Ngaa

n̄i s̄i garasun sij rian ni ngüi nico' Yan'anj mánj.

¹⁷N̄i hua n̄ian si ga ní'yanj ni ngüi rian ni tsínj huin achij huin ni tsínj nicaj yun'unj ni ngüi nico' Yan'anj.

¹⁸Daj si gataj si-nuguan' Yan'anj:

“S̄i ga'n̄ij re' nnánj du'ua sicúj ngaa utin' xuj strigo mánj.” Hué daj gataj si-nuguan' Yan'anj. N̄i ango yu'uj gataj rian si-nuguan' Yan'anj: “Tsínj 'yaj sun, n̄i hua si-chrej sij si gui'yaj gana sij san'anj.” Hué daj gataj rian si-nuguan' Yan'anj. ¹⁹S̄i duná re' s̄isi ga'mi gaquin' ni sij xi'í 'ngo tsínj nicaj yun'unj ni ngüi nico' Yan'anj ngaa nitaj huj hua'nij testigo ga'mi xi'í sij. ²⁰N̄i tsínj huaj gue 'yaj gaquin', n̄i nata' re' si-gaquin' sí' rian sí' ngaa mán daran' ni tsínj nahuin yu'. Ngaa n̄i guxu'ui' ango ni sij s̄isi s̄i gui'yaj ni sij gaquin' mánj.

²¹Ngaa n̄i a'n̄ij sun rián re' s̄isi hué daj gui'yáj re' nuguan' nan. N̄i s̄i gani ruhuá re' s̄isi hua sa' 'ngo tsínj daj rian ango tsínj mánj. San̄i uyan gui'yáj re' nga daran' ni sij. N̄i xacaj re' cuenta s̄isi ni'yaj Yan'anj nga Jesucristo nej, ni ángel nacui Yan'anj nej. ²²S̄i ga yoo ruhuá re' guta' re' ra'á re' rian 'ngo tsínj gahuín sí' 'ngo tsínj huin rian rian ni ngüi nico' Yan'anj mánj. San̄i asij sini n̄i gani sa' ruhuá re' si gui'yáj re'. Ngaa n̄i s̄i da'uí re' si-gaquin' ango tsínj mánj.

²³Xi'í si nico' huaj a'nán' re', 'yaj riquí re', n̄i s̄i go'ó re' urin nnee yun mánj. San̄i go'o re' doj vino gui'yaj gono'o riquí re' aj.

²⁴Rugüi' renga' si-gaquin' go'ngo ni tsínj ngaa achin n̄agui'yaj yya Yan'anj si-gaquin' ni sij. San̄i hua

ango ni tsínj, n̄i da rucu gurugüi' si-gaquin' ni sí'. ²⁵N̄i hué ducúanj daj rugüi' renga' ni rasun sa', 'yaj ni ngüi. N̄i s̄isi nitaj si rugüi' ni rasun sa', gui'yaj ni ngüi, san̄i s̄i ga'ue guixij huí niganj ni rasun sa' da mánj.

6 N̄i ni tsínj 'yaj sun yun rian 'ngo xuru'ue, n̄i hua n̄ian si ga ní'yanj ni sij rian xuru'ue daj. Ngaa n̄i s̄i ga'mi quij ni ngüi nga si-xugüi Yan'anj nga xi'í nuguan' digyán únj nej. ²N̄i s̄isi 'yaj sun 'ngo tsínj daj rian 'ngo xuru'ue huin tsínj xuman ruhua ni'yaj Yan'anj, n̄i s̄i duna sij si ga ní'yanj sij rian xuru'ue daj xi'í si xuman ruhua sí' ni'yaj sí' Yan'anj mánj. San̄i hua n̄ian si gui'yaj sun sa' sij doj rian sí'. Daj si tsínj rian 'yaj sun sij, n̄i huin sí' 'ngo tsínj xuman ruhua ni'yaj Yan'anj. N̄i huin sí' 'ngo tsínj 'i ruhua ni'yaj sij.

Piedad y contentamiento

Hué nuguan' nan huin si nata' re', n̄i digyán re' rian ni ngüi, ruhuáj aj. ³N̄i s̄isi hua ni tsínj digyán ango nuguan' huin nuguan' nitaj si hua n̄ica ruhua nga nuguan' sa' nico' né', n̄i s̄isi sé nuguan' digyán Señor Jesucristo rian né' huin, ⁴ngaa n̄i hué ni sij huin tsínj nne nitaj si ni'i mánj. N̄i huin ruhua ni sij gunun' ni sij nga ni dugüi' ni sij. N̄i naduna nuguan' a'mi ni sij. N̄i ngaa hué daj 'yaj ni tsínj daj, n̄i huin xicoj ruhua ni sij ni'yaj ni sij dugüi' ni sij. N̄i unun' ni sij nej. N̄i a'mi quij ni sij xi'í Yan'anj nej. N̄i nun xuman ruhua ni sij nga ni dugüi' ni sij. ⁵N̄i n̄iganj unun' ni sij nga dugüi' ni sij xi'í si ani quij ruhua ni sij. N̄i nun ni'i ni sij nuguan' xanga' mánj. N̄i

ani ruhua ni sij sisi guí'yaj gana ni sij san'anj xi'í si huaj ni sij si-chrej Yan'anj. Xi'í daj gahuin nini re' rian ni tsínj daj.

⁶Ni sisi huin nia' ruhua né' nga si nicaj né' nico' né' Yan'anj, ngaa ni guí'yaj gana nico né' nuguan' sa'. ⁷Daj si ni a 'ngo ni rasun nun nicaj né' ngaa ga'nga né' chruhua xungüi nan. Ni a 'ngo ni rasun si ga'ue guinicaj né' gan'anj né' ngaa gahui' né' mánj. ⁸Ngaa ni sisi hua si xa né', ni hua si-gan' né' guinun né', hué daj síj ga'ue gahuin nia' ruhua né'. ⁹Sani ni tsínj huin ruhua gahuin xuru'ue, ni guinij ni sij rian gaquin'. Ni rún' huaj sisi numij sichre nne' ni sij. Ni ani ni'yun ruhua ni sij. Xi'í daj ni ran' ni sij sayun. Ni niqui niman ni sij si guere' ni sij gan'anj ni'ya ni sij. ¹⁰Daj si ga'ue guí'yaj ni ngüi daran' gaquin' xi'í si huin ruhua ni sij ni'yaj ni sij san'anj. Ni hua duna go'ngo ni ngüi si-chrej Yan'anj xi'í si huin ruhua ni sij ni'yaj ni sij san'anj. Ni ducu guiran' ni sij sayun.

La buena batalla de la fe

¹¹Tsínj nicaj dugüi' nga Yan'anj huín re'. Ngaa ni si gahuin ruhua guí'yaj ganá re' nico san'anj mánj. Ga gue gache re' 'ngo chrej nica. Ni guinico' re' Yan'anj. Ni guxuman ruhuá re' ni'yaj re' Yan'anj. Ni ga 'i ruhuá re' ni'yaj re' Yan'anj. Ni ga'nin' ruhuá re' nga ni sayun rián re'. Ni ga ni ruhuá re' nej. ¹²Ni daj rún' 'yaj 'ngo snado ngaa guí'yaj gana sij rian 'ngo sayun, ni hué daj guí'yáj re' rian si quij xi'í si xuman ruhuá re' ni'yáj re' Yan'anj. Dugu'nun' re' si gane niganj re' nga

Yan'anj. Daj si gaquínj Yan'anj sisi gane niganj re'. Ni hua natá' re' rian nico ni ngüi sisi hué re' huin 'ngo tsínj xuman ruhua ni'yaj Yan'anj.

¹³Yan'anj guí'yaj sisi hua ni'na' daran'anj. Ni dugu'naj huin nuguan' nata' Jesucristo xi'í nuguan' xanga' rian tsínj gu'naj Poncio Pilato. Hué dan ni rian Yan'anj nga Jesucristo, ni a'nij sun rián re' ¹⁴sisi dagahuin re' nuguan' ga'nin' Yan'anj sun rián re'. Ni si naduná re' nuguan' da mánj. Ngaa ni si ga'mi gaquin' ni ngüi xi'í nuguan' da mánj. Ni hué daj guí'yáj re' da ga'na' Señor Jesucristo chruhua xungüi nan. ¹⁵Ni Yan'anj huin si gataj un güi ga'na' Jesucristo. Ni urin Yan'anj nucuj nin' ruhua. Ni hua 'ueé Yan'anj nej. Ni Yan'anj huin Rey nicaj sun rian daran' ango rey. Ni Yan'anj nicaj sun rian daran' ango tsínj nicaj sun. ¹⁶Urin Yan'anj si ga'ue gahui' mánj. Ni Yan'anj huin si nne rian xiguin yan'an. Ni a 'ngo ni ngüi si gunucuj gahuin nichrun' rian xiguin yan'an da mánj. Nitaj aman guini'i a 'ngo ngüi man'an Yan'anj mánj. Ni si ga'ue guini'i ni ngüi Yan'anj mánj. Niganj guinun yan'anj né' man'an Yan'anj. Ni niganj guinicaj Yan'anj sun ruhuáj aj. Amén.

¹⁷Ga'nin' re' sun rian ni xuru'ue man chruhua xungüi nan sisi si gahuin nne ni sij mánj. Ni si gani ruhua ni sij sisi ga sa' rian ni sij xi'í si hua nico rasun nicaj ni sij mánj. Daj si nitaj si hua xitinj mán né' guí'yaj nico rasun mán rian né' mánj. Maan si gana'uij ni xuru'ue sisi dugumi Yan'anj

ni sij. Ni Yan'anj huin si riqui daran'anj rian né'. Ni riqui sa' Yan'anj rian né' sisi gahuin niá' ruhua né', gui'yaj ni rasun daj. ¹⁸Gataj snan'ánj re' rian ni xuru'ue sisi gui'yaj sa' ni sij. Ni gui'yaj nico ni sij sinduj rian ni ngüi. Ngaa ni gahuin ni sij xuru'ue rian Yan'anj. Ni ga sa' ruhua ni sij gura' da'aj ni sij si'yaj ni sij ga'ui' ni sij rian ni ngüi aj. ¹⁹Ni sisi hué daj gui'yaj ni sij, ni gahuin xuru'ue ni sij rian Yan'anj. Ni nara sa' ni sij ni rasun sa' xata'. Ni guiri' ni sij gane niganj ni sij nga Yan'anj.

Encargo final de Pablo a Timoteo

²⁰Timoteo, dugumi sa' re' nuguan' sa' riqui Yan'anj rián re'. Ni si nanun chraqúj re' nuguan' yya huin nuguan' nun ní'yanj a'mi ni tsínj man chruhua xungüi nan ga mánj. Ni si nanun chraqúj re' ngaa ataj ni sij sisi nuguan' chrun sa' huin nuguan' a'mi ni sij mánj. ²¹Daj si hué go'ngo ni tsínj ataj sisi chrun ni sij nga nuguan' daj. Sani hua duna ni sij si xuman ruhua ni sij ni'yaj ni sij Yan'anj.

Hué dan ni huin ruhuāj sisi gui'yaj Señor sinduj rián re'. Amén.